

Headlines

- कश्मीर दी ऐतिहासिक डल झील च “खेलो इंडिया वाटर गैम्स -2025” दा अज्ज आगाज होग।
- शिक्षा मंत्री स्कीना इतू होरें आक्खेया ऐ जे समकालीन चुनौतियें दे हल ते ज्ञान आधारत समाज दे निर्माण लेई शोध आधारत शिक्षा बड़ी महत्वपूर्ण ऐ।
- साईंस ते टेक्नोलोजी मंत्री सतीश शर्मा होरें टेक्नोलोजी ते उद्योगें बश्कार बेहतर तालमेल पर बल पाया ते नमें नियुक्त कीते गेदे Research Assistants गी नियुक्ति-पत्र दिते।
- किश्तवाड़ जिले दे चशौती ग्रां च बददल फटने मगरा राहत ते बचाव अभियान 8में रोज बी जारी ते इस घटना च एजें तोड़ी मरने आहले दी गिनतरी 65 होई गेई ऐ।
- ते मौसम विभाग नै जम्मू-कश्मीर च 23 थमां 26 अगस्त बश्कार भारी बरखा ते चानचक्क हाड़ औने दी पेशगोई कीती ऐ।

<><><><><><>

Khala India Water Sports

अज्जै थवां श्रीनगर दी डल झील कश खेड्डें दे उत्सव खेलो इंडिया वाटर स्पोर्ट्स फेस्टिवल 2025 शुरु होआ रदा ऐ। ए इस खिते च होने आला अपनी किस्मा दा पैहला ऐ। एहदे च 36 राज्यें ते केन्द्र शासित प्रदेशें दे 800 थमां बदद खडारी कयांकिंग, कैनोइंग, रौइंग ते नेइएं होर गतिविधिएं च हिस्सा लैडन। इस कार्यक्रम दी शुरुआत संजा 6 बजे होग। इस दरान शानदार उद्घाटनी समारोह आयोजित होग जेदे च ड्रोन शो, लोक नाच बगैरा शामिल न।एह आयोजन जम्मू-कश्मीर दी सैलसफा समर्थ, संस्कृति ते दस्तकारी गी प्रदर्शित करने दा इक मंच उपलब्ध करोआग। एहदा सरिस्ता जम्मू-कश्मीर खेड्ड परिषद ते युवा मामलें सरबन्धी मंत्रालय आसेआ कीता जा'रदा ऐ। इनें खेड्डें च हिस्सा लैने आले खडारियें हरपाल सिंह ते नितिश चौधरी होरें अपने विचार सांझा करदे होई आखेआ.....(बाईट)

<><><><><><>

Sakeena Education (Byte)

शिक्षा मंत्री स्कीना इतू होरें आक्खेया ऐ जे समकालीन चुनौतियें दे हल ते ज्ञान आधारत समाज लेई शोध-आधारत शिक्षा बड़ी महत्वपूर्ण ऐ। मंत्री होरें एह गल्ल GGM साईंस कालेज आसेया आयोजित बक्ख-बक्ख शोर्भे च होआ रदे- शोध सरबन्धी Emerging Trends in Multidisciplinary Research यानि ICETMR -2025 दे दंऊ-रोजा अंतराष्ट्रीय सम्मेलन गी सम्बोधत करदे होई आक्खी। अपने सम्बोधन च मंत्री होरें GGM साईंस कालेज दी शैक्षणिक उत्कृष्टता लेई वचनबद्धता ते युवा शोधकर्ताएं गी इक मंच उपलब्ध करोआने लेई सराहना कीती। उनें शोधकर्ताएं ते विद्यार्थियें च नवाचार-आपसी सैहयोग ते आलोचनात्मक सोच गी बढ़ावा देने दे महत्व पर लौ पाई-तांजे उनेंगी भविक्ख च वैश्विक चुनौतियें लेई तयार कीता जाई सकै। मीडिया आहले कन्नै गल्लबात करदे होई शिक्षा मंत्री स्कीना इतू होरें आक्खेया.....(बाईट)



Satish –Tech Innovations

साईस ते टैक्नालोजी मंत्री सतीश शर्मा होरें टैक्नालोजी ते उद्योगें बश्कार बेहतर तालमेल पर बल पाया, तां जे नमीं टैक्नालोजी ते काड्डें राएं जमीनी स्तह पर लोके दियें जायज जरूरतें गी बेहतर ढंगे सिर पूरा कीता जाई सकदा ऐ। मैहकमे दी जायजा बैठक च बोलदे होई मंत्री होरें आक्खेया जे आधुनिक टैक्नालोजी शडी लैब्राट्रियें तक्कर गै सीमित नैई रौहनी लोडचदी, सगुआ इस्सी जमीनी स्तह पर आन्नियै, इसी लागू करियै, लोके मुजब हल उपलब्ध करोआइयै, समाज गी सिददा लाह पजाना लोडचदा। उनें मैहकमे गी हिदायत कीती जे ओ शोध सरबन्धी साथ-सहयोग, स्टार्ट-अपस गी बढ़ावा देने ते नमें विचारें ते नमियें काड्डें गी बढ़ावा देन ते उनेंगी इक पूरा पराता उद्यम बनने च मदद करन। मगरा शर्मा होरें साईस ते टैक्नालोजी मैहकमे च हाल च नियुक्त कीते गेदे Research Assistants गी नियुक्ति-पत्र दिते।



Hospitals on Wheels

सेहत सेवाएं गी मजबूत करने दी दिशा च इक बड्डी गें पुट्टदे होई रामबन जिला प्रशासन अपनी (Hospital on Wheels) पैहल दे जरियै दूर-दरेडे इलाके च लोके दे घरै तक्कर उनेंगी सेहत सेवा उपलब्ध करोआ करदे न। आकाशवाणी जम्मू दे संवाददाता नै दस्सेया ऐ जे इस पैहल तैहत बुधवारें मैडिकल ब्लॉक गूल दे Ind गां च इक मैडिकल कैम्प दा आयोजन कीता गया- तां जे जिनें इलाके पुज्जना सौक्खा नैई ऐ- उनें इलाके च सेहत सेवाएं दी कमियें गी दूर करियै- बेल्लै सिर लोके दा इलाज कीता जाई सकै ते उनेंगी मुफ्त दवाइयां उपलब्ध करोआइयां जाई सकन। इस कैम्प दा मुख मकसद ग्रामीण इलाके च रौहने आहले लोके च सेहत सरबन्धी जागरुकता पैदा करना ऐ। डाक्टरें ते नीम मैडिकल अमलें दी इक मैडिकल टीम नै 160 मरीजें दा इलाज कीता।



Samba Accident (Dispatch)

अज्ज बड्डलै साड्डे 3 बजे दे करीब साम्बा जिले दे जटवाल कश उत्तर-प्रदेश थमां श्री माता वैष्णो देवी कटरा जा रदी इक बस दा टायर फट्टी गया ते बस पटलोई गेई- जेहदे च इक श्रद्धालू दी मौके पर गै मौते होई गेई ते 39 होर जखमी होए न। साम्बा पुलिस मौके पर पुज्जी ते जखमी होए दे श्रद्धालुएं गी सरकारी जिला अस्पताल ते किशें गी विजयपुर दे AIIMS अस्पताल पजाया- जित्थे डाक्टरें इक श्रद्धालु गी मृत घोषित करी दिता। होर जानकारी साम्बा दे जिला संवाददाता सतपाल शर्मा थमां.....(बाईट)



Chishoti Search Op.

किश्तवाड़ जिले दे चशोती गां च बददल फटने मगरा राहत ते बचाव आला कम्म 8में रोज बी जारी ऐ। इस घटना च 65 लोक मारे गे, इन्दे च CISH दे 3 कर्मी ते जम्मू-कश्मीर पुलस दा इक SPO शामिल ऐ। आकाशावाणी जम्मू संवाददाता दी रिपोर्ट मुजब इस घटना च 100 लोक घायल होए ते 70 लोक अर्जे बी लापता न। सेना, NDRF, SDRF, CISH, सीमा सिड़क संगठन, पुलस ते मुकामी लोक किट्ठे रलियै राहत ते बचाव कम्म गी अंजाम देया रदे न। एदे च भारी मशीनें दे इलावा खोजी कुतें दी बी मदद लैती जा रदी ऐ। सेना आसेया बनाए गेदे पुल करी बी इस बचाव अभियान गी बल थोआ ऐ। गृह मैहकमे दे प्रधान सचिव चन्द्राकर भारती होरें कल इस इलाके दा दौरा लाया हा ते जमीनी सतह पर चला रदे राहत ते बचाव कम्में दा जायजा लैता।

<><><><><><>

Div.Com Kathua

जम्मू दे डिविजनल कमीशनर रमेश कुमार ते IGP जम्मू बी. एस. टूटी होरें कठुआ जिले च बददल फटने ते चानचक्क हाड़ औने करी प्रभावित इलाके दा व्यापक दौरा लाया ते उत्थे जारी राहत बचाव कम्मे दा जायजा लैता। SIDCO घाटी च कायम शिविर च रवा रदे प्रभावित परिवारें कन्नै डिव.कॉम होरें मलाटी कीती ते जोड़ इलाके च इस करोपी करी 5 लोक मारे गेए हे। उनें प्रभावितें गी सरकार आसेया हर संभव सहायता दा भरोसा दोआया। डिव. कॉम होरें दिलवान गां दा दौरा लाया ते सिड़क ढांचे ते होरनें थाहरें गी होए दे नुक्सान दा जायजा लैता। मगरा उनें GMC कठुआ दा दौरा लाया ते घायलें दी डौल पुच्छी। मीडिया कर्मियें आलें कन्नै गल्ल करदे होई डिव.कॉम होरें आक्खेया.....(बाईट)

<><><><><><>

Kailash Kund Yatra

त्रै-रोजा कैलाश कुंड यात्रा भद्रवाह दे वासुकी नाग मंदरै च शुरू होई गई। इस जातरा कन्नै लोकें दी आस्था जुड़ी दी ऐ। आकाशवाणी जम्मू संवाददाता नै जानकारी दिती ऐ एह यात्रा पूरी धार्मिक श्रद्धा ते उत्साह कन्नै शुरू होई। किश्तवाड़ च हाल च पेश आई दी बददल फटने आहली घटना दे मददेनजर इस जातरा पर जाने आहलें दी गिनतरी सीमित कीती गई ऐ। एह गैंs एहतियाती तौर पर पुट्टी गई ऐ। छड़ी मुबारक गी भद्रवाह कस्बे लेता गेआ। मीडियाकर्मियें कन्नै गल्ल करदे होई SSP डोडा संदीप मेहता होरें आक्खेया.....(बाईट)

<><><><><><>

Weather

मौसम विभाग नै औने आले किश दिनें च भारी बरखा ते चानचक्क हाड़ औने दी पेशगोई कीती ऐ। आकाशवाणी जम्मू संवाददाता नै विभाग दे हवाले नै जानकारी दिती ऐ जे जम्मू, रियासी, उधमपुर, साम्बा, कठुआ ते राजौरी, 22 अगस्त रातीं किश थाहरें पर भारी बरखा होने दी पेशगोई कीती गई ऐ। 23 थमां 26 अगस्त तगर जम्मू-कश्मीर दी केंई सारी थाहरें पर भारी बरखा पौने ते अंधी झक्खड़ झुल्लने दे असार दस्से न। ओब इलाके जेड़े मते प्रभावित होगन उन्दे च जम्मू- रियासी- उधमपुर- साम्बा- कठुआ-राजौरी- अनंतनाग ते कुलगाम शामिल न। मौसम विभाग नै पुंछ, रामबन, डोडा ते किश्तवाड़ च दरम्याने दर्जे थमां भारी बरखा बरने दे असार दस्से न।

<><><><><><>